

Nimahsela ka mi fel chu
 Rinnain a nung ang:A
 nnungtawlh erawh chuan,
 Ka rilruin amahah chuan
 lawmna reng a nei
 lovang. (Heb 10:37-38)

KRISTIAN THALAI

MAY
 2013



Kristian Thalai Pawl Churchinbu Thla tin Vol. IV, No. 3

KRISTIAN THALAI PAWL SERCHHIP KAWNPUI BRANCH
GOLDEN JUBILEE
 14th - 20th JANUARY, 2013
 Thupul : A laih leus, Johana 19:18



Noxatilla-ah Work Camp-in kan kal



KA MAMAWH TAWK CHU KA THIAM

Lalpan a rawngbawol tur hian mi fel leh thiam, hausa, sum ngah, thusawi thiam, thenrual kawm thiam tak leh mi inphalte chauh a thlang lo va, an bula awmten rawngbawoltu ni tlaka kan ruat loh leh ngaih lohte pawh hi Lalpan a thlang thin. Pathian rawngbawol tur hian thiamna hrang hrang a pawimawhzia kan hre bel tawh hle, mahse thalaiten Pathian rawngbawol zel tur hian eng hi nge pawimawh kan tih ber, tunlai khawvelah hian? Chhanna tam berah chuan mi inpete hi Lalpan a hmang duh a, a hmang tangkai thin tih kan hria a, kan chhut thlen thin loh erawh chu mi inpe tak takte zingah an zirna theuha mi thiam an hlu zual thin em?

Zirna han tih hian ni tin lehkha zir bakah hna kan thawh mekna leh hna thawk thei tura zirna leh thiamna hrang hrang a huam a, heng zirnaah hian thiamna tak tak neih tumin ke kan pen em? Kan taima em? Entir nan, Mizoramah hian computer lei leh neih kan intihhmuh hle, thil tha tak a ni, mahse "ka mamawh tawok chu ka thiam" ti te thiamna han hmuh hian a beitham ve hle hian ka lo hre thin. Thalaiten harsatna kan tawh mek chu zirna leh thiamna neih belh tumna kawnga ke pen lova, a rual pawl tawok chauha zirna thil hrang hranga kan kalpui thin hi a ni em? Hei hian Pathian rawng kan bawlnaah pawh a rual pawl tawok chauha tel duhna rilru min pe a, a rual pawl tawok chauhkan kan thiam a, a rual pawl tawok chauhkan Pathian rawng kan bawol thin a nih hi. Thalaiten hian ei kan zawonna atana pawimawh tak zirna kan thlahthlam lutuk ta em? Kan mawhphurhna pawh hlen lo leh kan thlen theih tur Pathian hruainaa thleng thei tura kan inngaih thinna hi rawngbawola kan chet chhuah vелеh kan theihngihl ta a ni em? Chhuanlamah kohhran leh thalaia inhman awangin zirna chhunzarom tha thei lo kan nih thu kan sawi hian Pathian hming kan tihliau a ni em? Hetih lai hian thalai tam tak KTP-a inhman mek, mi tumruh leh taima, mi rinawm, an ni tin nunah leh an hnaah tam tak an awm a, mi dang tana malsawmna nih an harsat lo.

Zirna, thiamna ngai pawimawh Pathian biak nachang hre reng reng lo a awm theih bawok. Mahse, Pathian be lo nun hrehawmzia an han hriat chhuah meuh chuan a lo tlai lutuk fo mai. Chuvangin, keini thalaiten hian zirna leh Pathian rawngbawolna hi kal kawptir tumin tan i'n la thar leh teh ang u. Chu chuan hmasawonna tha, dik leh fel min thlen ngei ang ♦

MI DANG TANA MALSAWMNA

Gen 12:2; 22:12ff; 32:24-32; Mat 26:36-39; Mk 14:32-42; Lk 1:26-38;
19:1-10; 22:39-46

– Pastor C. Laltharzuala,
Khawzawl Dinthar

Kan thupui ‘*Mi dang tana malsawmna*’ nih a ÷ul leh pawimawh dan hi mi tinin kan hriat leh kan rilrua Chiang sa a ni a. KÏP-ten kan thupui leh kan zir mek a ni a, mi thiam zawkten a bu meuh siamin zir turin an buatsaih a, kan zir mek a ni a. A sawitu azirin he thu pawh hi kawng hrang hrang leh chi hrang hranga sawi theih a ni awm e.

A awmzia:

Mi dang tana malsawmna tih awmzia kan sawi dawn chuan a hmasain Abrahamahna Pathian thuthlung hi lo zir Chiang hmasa ta ila. ‘*Nang malsawmna ni ang che*’ tih leh ‘*Nangmahah chuan leia hnam tin an la thawveng ang*’ tih ÷awngkam hi a ÷awng bul lam (Hebrai ÷awng)-a a awmzia chu ‘*I hming chu mi zawng zawng hmuiah malsawmsakna ÷awngkamah a la chang ang*’ tihna a ni. Abrahamahna hming chu miten malsawmna an induhsak tawna sang ber ÷awngkam atan hman a ni ang, tihna a ni.

Hei hi a awmzia chu Abrahamahna chungah malsawmna chu a ropuiin a tak a, amah malsawmtute chu Pathianin mal a sawmsak ang a, ânchhelawhtute chu Pathian pawhin ânchhia a lawh ve dawn a ni. Hnam tinin malsawmna an dil emaw, duhthu an sam emaw chuan he ÷awngkam “E! Abrahamahna ang meuhvin vannei ila,” an tihna a ni.

Kawng hrang hrangin mi dangte tana malsawmna kan nih theihna tur lo zir ho ila:

1. Abrahamahna chu mi dangte malsawmna ni tur chuan a hmasa berah a neih chhun – a khua a ÷anga chhuah a ngai. A laichinteho leh a Pa in a ÷anga a chhuah hmasak a ÷ul. Malsawmna ni tak tak tura Pathianin a buatsaih chu Gen 22:2-ah a fapa neihchhun, a hmangaih, Isaka ngei hlan turin a ko. Gen 22:12-ah a fapa neih chhun pawh Amah (Pathian) pek a ui loh avangin

‘Pathian a ðih’ tih Pathianin a puang chhuak. Gen 22:16ff-ah chuan mal a sawm tur thu a hrilh a, chang 18-ah pheih chuan a thlahah, khawvela chi tin hnam tin an la thawveng ang tih amah leh amah inchhalin chhia a chham ta tih LALPAN a sawi.

2. Jakoba pawh mi dangte tana malsawmna a nihna bul inñanna tak tak chu Gen 32:24-32-ah kan hmu a, a chakna zawng zawng leh a theihna zawng zawng tihchhiatsak a nih vek hnu khan mi dangte tan malsawmna a ni thei chauh a ni. A malpui ruh chuktuah tihpelhsawlh a nih hnu khan tlawmna nasa tak nen a u Esauva tawh turin huphurh takin a kal a, awlsam takin a hneh ta a ni tih kan hmu.

3. Zakaia pawh kha chhiah khawntu ‘mi sual’ an tih, mi zawng zawngin an huatrawn a ni a, Lal Isua zirtirte meuh pawhin mi sual an tih a ni. Lk 19:1-10-ah a chanchin chiang takin kan hmu a, khatiang khawpa miten chhiahkhawntu mi sual, ei ruk hmang nia an ngaih ni mah sela, Lal Isua a hnena a thlen meuh chuan mi dangte huat ðin kha mi dangte tana malsawmna a ni ta tlat mai! Mi sual a nih Lal Isua hmaah a inhre chiang ta tlat a, mi dangte tana malsawmna ni turin tih

luh leh ti rawh tih ngai miah lovin, tlawm rawh tia nawr luih ngai miah lovin, amah leh amah mi dangte tana malsawmna ni turin a intiam ta nghal a. A thawh ta nghal a ni.

4. Mari leh Josefa chanchin hi Mat 1:20-25 leh Lk 1:26-38-ah kan hmu a. Juda-te inneihnaah chuan ‘Inhualna’ an nei hmasa ðin a, inhualna an nei hun chhung hi kum khat vel a ni ðin. Hemi chhung hian eng vang pawhin mi dang lakah an chesual tur a ni lo va, dem kai pawhin an awm tur a ni lo. Chutianga an lo chesual emaw a nih chuan uire an ni a, a hremna chu den hlum emaw hial theih a ni. Chutiang dinhmun khirh tak leh thi mai thei khawpa a din lai chuan Thlarau Thianghlimin Mari a raitir ta tlat mai a. Josefa tan hian mihring pangngai ve bawh a nih avangin hriatthiam mai theih a ni lo va. Zan pawh mu thei lova tal tap tapna tham a ni. Mahse, a mumangah Pathianin a hrilhfiah hnuah chuan lungawi leh thuawih takin a nupui hual Mari chu ihe lovin a nei ta a ni. Mari lahin a dinhmun khirh turzia a hre chiang a. Mite hriat leh hmuh danah pawh den hlum hial khawp theihna sual a tling tlat a ni. Mahse, chungnungbera thiltihtheihnain a hliahkhuh

dawn avangin thuawihna famkimah a lut a. "Ngai teh, Lalpa bawihnu ka ni, i thu ang zelin ka chungah thleng rawh se," a ti ngam ta a ni. Mari leh Josefa hi an mualpho thu kan hre lo va, mi zawng zawng chhandamna hna Lal Isuan a rawn thawh theih phah a ni. Hei hian chiang taka min hrih chu mi dangte tana malsawmna ni tur chuan thuawihna bawihah thih ngama inpekna hmunah malsawmna a rawn thleng ta chauh a ni. A va han harsa teh lum em!

5. Lal Isua kha khawvela chhandamna famkim rawn thlen turin mihring anga pian te, bawih anga insiam te mi tam tak tihdam te kha a tawk zo lo. Mat 26:39ff, Marka 14:36ff leh Lk 22:42ff te hian Lal Isua kha Gethsemani huanah, "Aw ka Pa, a theih chuan he no hian mi pel lul rawh se; nimahsela, keima thu ni lovin, nangma thu thu ni zawk rawh se," tiin a tawngtai a. Ama mihrinna kha chuan thihna no kha pumpelth ve ngei a duh a, a chhan chu mihring famkim a nih vang a ni. Kha a tawngtaina kha lo hlawhtling ta sela chuan chhandamna hi mihringte hian kan chang thei dawn lo a ni. Mahse, mi dangte tana malsawmna famkim chhandamna hna thawk tur

chuan Lal Isua meuh pawh khan, 'Keia thu ni lovin nangma thu thu ni zawk rawh se' a tih ngam a t̄ul tlat asin. Helai thu hian chiang taka min hrih chu tlanna famkim hlenchhuak tur pawhin Fapa meuh pawhin thuawih a zir tlat. Chu chiah chu a ni mi dangte tana malsawmna awmzia chu.

Mi dangte tana malsawmna ni tur hian a hmasa berah chuan thuawihnaah a in̄an a, Lal Isuan chhandamna hna a rawn thawhin mi dangten nun an neih theihna turin a tawp thlenga thuawihna a neih vang a ni.

Mi dangte tana malsawmna ni tur chuan ei theih tura thih hmasak a t̄ul:

Sa chu a thih chian chauhvin mi dangte tan ei tur a pe chhuak thei tih kan hria. Mulukawllhten sa ruang an kil a, a thi a ni tih an hriat chian hnua an hnaih ngam chauh angin mi dangte tana malsawmna ni tur chuan kan mihring hi a thih hmasak a ngai t̄hin a ni. Nung ve, che ve a la awm chhung chuan mi dang kan hnar a, min lo hnaih tak tak thei t̄hin lo. Mi dang tana malsawmna ni tur chuan ni tin nung tura kan thih hmasak hi a pawimawh fo dawn a ni.

ZENG ZÂWNTUTE KHA

– Zonunsanga
Tuithumhnar

Marka 2:5 : *"Tichuan, Isuan an rinzia chu a lo hmuhin zeng hnenah chuan, "Ka fa, i sualte ngaihdam a ni tazh e," a ti a.*

Juda sakhuaah hian dam lohna, harsatna hi 'sual' leh kan thil tihsual avanga hremna tia ngaih dan thuk tak a awm avangin he laiah hian Lal Isua hian an hriatthiam dan turin a sawi a nih a rinawm a. Nimahsela, amah Isua vek hian Johana ziakah a zirtirten heng harsatnate hi "Tu tihsual nge ni ang le?" tia an zawh khan, "He mi hian a ti sual lo, a nu leh pain an tihsual hek lo, Pathian hnathawh a chungah a lanna tur a nih zawk hi" (Joh 9:3) a ti mai a. Hei hian sual avanga tuarna chu awm tho mah se Pathian hian chung zawng zawng chungah chuan thu a nei a ni tih a tilang awm e.

Helai changah pawh hian mi thiam thenkhat chuan Isua hian sual avanga natna lo awm chu a pawm ve tho vang a, he zeng ngei ngei pawh hi a sualna avanga a damdawi dik tak, 'sual ngaihdamna' kha a pe a ni ang tiin an sawi ve tho va. A dikna ber kan hre tazh lo va, kan hriat erawh chu zeng khan damna a chang a ni tih lai hi a ni.

Zeng zawntute hi tute nge an nih Bible-in a sawi lo va, mi tute emaw an ni phawt mai a. A thiante nge a chhungte tih sawi lan pawh a awm chiah lo bawh. Luka ziakah hian Isua bul hnaia awm te hi an hraw (prominent citizen) hle a ni tih a lang a, Pharisai leh Dan zirtirtute an awm tih kan hmu a. Chutiang mi ropui tak tak, Galili leh Judai ram te, Jerusalem khua a tanga lo chhuak te an nih nuk hlawm avangin han mitthla pheih chuan a zamawm leh zual awm e. Zeng tihdamna thu kan hmu a, a zawntute an pawimawh zia pawh kan hmu a. Tunlai atana a pawimawhna tawi te te i'n en teh ang –

1. Mi dang hruai turin kan pawimawh:

Zeng hian Isua hmuh a duh a ni ang tih a rin theih a. Chuti pawh ni se amahin a kal thei lo a ni tih kan hria. Hruaitu, kawh hmuhtu, zawntu tur a mamawh a ni tih kan hria. Helai thu hi han bih chian hian ropuina deuh a nei a. Chu chu zeng rinna ni lo, a zawntute rinna thuk tak – 'an rinzia chu a lo hmuhin' (ch. 5) a tih lai hi a ni. A inrin kep theih tih lam a ni lo naa, kan rinna avang hian tam tak chuan malsawmna an chang thei a ni tih a lang reng mai. Kan velah hian kawh hmuhtu mamawh ngawih ngawih an awm ang tih a rinawm tlat a, keimahniah rinna thuk tak an nei a ni tih hi hre nawn fo ila.

2. Hnuh dawr dawr an ngai:

Zeng pawh khan a nihna takah chuan a lo duh lo ve mai thei. A dam tak tak pawh a inring kher lo mai thei. Khatiang mipui zozai zingah chuan a zah te pawh a zak ve ang. Kan hre lo. Nimahsela, hei erawh kan hria. A zawntute khan an zawn dawr dawr a, Lal Isua hmuh an tumna kalkawngah khan damlo kha an rawn thu Bible-ah kan hmu lo. Lalpa hmuhtir ngei tumin mi dang pawh ngaichang hleithei lovin a theih dan danin an tlan dawr dawr a ni tih kan hria. Kan vela mite hi a chang chuan hnuh dawr dawr an ngaih hunte pawh a awm ang. Kan hnuhna hmanrua chu eng pawh ni se Isua an hmuh theihna a nih chuan sitawm a awm thei dawn em ni? Kan hnuh thlena, Lalpa hnen kan thlen phawt chuan keimahni pawh a lawm tur hlei hlei kan la ni dawn a ni. Member hlate kan hnuh hnaihna tur hian hmanraw dang dang kan ti a, tih dan changkang deuh pawh kan duh thin. A tha viau zel mai. Chutih lai chuan a hnuh hnaih tumtute tih tak takna hi a pawimawh zawk ang em?

3. Min phuartu hi thiah a tul chang a awm ang:

Kan tih dan, kan practise, kan tradition hi thlak danglam a ngaih hun a awm ang. Kan invawna dan leh kan rawng-bawl na hi member hla zawkten Isua hmel an hmuh theih loh khawp hian kan lo siam palh thei

ang em? Heng hi kan thiaha, kan pawh fan a ngaih hun te pawh a awm a tul ang em? Lalpa hmuh theihna tura zeng zawntute tih dan kha mi dang tan chuan 'kan ti ngai lo' tih tur a ni ang. Mi ropui tak tak an awm laia inchung an han thiat rap rap te kha ngaihtuah ila, an huaisen hle mai! Helai hi sawi tham a awm ngei ang. An hmanrua kha a dangdai bawk. Lalpa hmuh nan inchung thiah hnatlang an nei a, mi dangin malsawmna a chang daih mai!

4. Beiseina nung kan neih a ngai:

He zeng zawntute hian heti khawpa Lalpaa rinna an nghat ngam hi an entawntlak hle mai. Lalpa hnen an thlenpui phawt chuan damna a chang dawn a ni tih kha an ringa, an rinna chu thiltihin an thawhchhhuahpui tih kan hmu a. Hei hian Jakob an rinna chu thiltih tel lo chuan thi a ni tih a sawi kha a tak takin an lantir tih kan hmu. Awm hmunah khan 'a tihdam theih ka ring' tiin thiltihin zawm lo se chuan he Isua thilmak tih hi kan chhiar kher lo mai thei. Kan member hla zawkteah hian rinna kan nghat ngam lo a nih pawhin Lal Isua ah hian rinna nghat ngam ila, a hnen kan thlenpui phawt chuan a tidam duh ang tih hi beisei tlat ila. Chu beiseina nung nei thei tur erawh chuan keimahni lam pawh fan kan lak a ngai ang. Member hla zawkte hian keimahniah beiseina thuk tak an nei a ni tih hre chungin zeng zawntute hi kan ngaihtuah thar fo a pawimawh hle awm e. ♦

DARTHLALANG

– Chris M.S. Dawngkima
Ramhlun North

Thinlunga khat liam chu kâin a sawi chhuak thin. Kan zingah thu sawi thei tak tak, nunpui si lo an tam tiin kan sawi chamchi a, a dik ngei ang. Nimahsela, a nunpui na na na chuan an sawi tam ang a, a sawi tam na na na chuan an nunpui zawk chuan a beiseiawm. Thil tha lo lam ngaihtuahna thinlung chuan thil tha lo a nun chhuahpui thin. Pathian thutak chuan i nun a hneh hmasakzet chuan i kâin a zep thei ngai lo vang; i nunin chu thutak chu hmu fiah rih lo mah se, i kâa Pathian i fak fo chuan i thinlung chu hnehin a la awm mahna. Pathian thu hi sawi tama nunpui chi a ni si a.

Mi tin hian thlamuanna mamawhin kan zawng thin a, pa angchhung belin faten thlipui-ruahpui an muthilhsan thin. Mi dangte dik lohna leh tlin lohna lai ringawt hmu thintu kiangah chuan fate takngial pawhin thlamuanna an hmu ngai lo ang. Tihsual nei chhin ngam lo khawpa huaisenna nei lo mihring tan khawvelah hlawhtlinna a awm thei lo. Mi chungchang chhuan chhe lam i sawi dawnin eng ang harsatna nge an tawh hriatpui

turin zir hmasa phawt ang che; mi tin hian mahni tawkah indona an hmachhawn vek si a!

Mi tin thinlung hi chhياتna leh thil tha lo lam bengkhawn tura siam a ni a. Zirtir ngai hauh lova chûn chawi nau ngeiin thûkna a pianpui ang hian, mi dangte rel leh sawichhiat te hi kan pianpui mizia chu a ni ngei mai. Nimahsela, heng thilte hi a ni lawm ni, puitling zia in a her liampui tur chu? Nun kawng dik i hmuh chu zawh rawh, i beisei ram thlen tur chea kawng tawi ber a ni. Thil tha lo aţanga thil tha zir tum hi finna atthlak tak a ni thei; i zir fin hmian a ei zo hlauh dah ang che. Sawiselna aiin fuihna leh fakna thute hian mi nun a chawm zawk a, an thlen phak loh ram i thlentir thei ang. I fate seilenna tur hmun i thlan kawngah fimkhur hle ang che.

I in chhungah ro sum tam tak khawl khawm mah la i fate nun i khawl khawm tel si loh chuan i in chhung chu nguian a la reh thuap ang. I nunin a ngaihhlut thilte chu vawng tha la, a lian ber aţanga a te ber thlengin thliar hrang rawh. Thil tha zawng zawng hi mi pakhat tan hneh chhuh theih a nih loh avangin i ngaihhlut zawngte chu vawng tha lehzual ang che. I chakna leh i lungdum zawng thilte chu zir chiang la, i theihna chu chem hriam tak anga i hman theih nan chher hriam rawh. Mihring thilitihtheihna thûkber chu ‘mahni inhriat chian’ hi a ni si a.

Ni tin mi pakhat tan malsawmna ni la, i dam lai ni a tlak hunin mi sang tam tak hnenah Pathian chu eng ang mi nge a nih i hriattir thei ang.

Mi zawng zawng hian kan pianpui hmai chu fiah taka kan hmuh theihna turin DARTHLALANG kan mamawh thin a. Darthlalang hmaah dinga chiang taka kan inhmu thin ang hian, kan vela mite hi kan tan inenna darthlalang chu an ni a. I jawngka chhuak leh i chetziaa mi

dangte thinlung i hneh hunah, chu darthlalanga i hlimthla lo lang chu i tan lawmna famkim thlentua lo ni tawh ang!

Nang leh kei hian Pathian kan faka, chawimawi phute kan chawimawi hian eng nge hloh kan neih? Mi dangte elrela kan sawisel hian eng nge hlawkna kan neih? I in chhungah thlamuanna a awm theih nan i thenawmpa chakna i mamawh dawn em ni? Nang leh kei hi mi dangte tana malsawmna, Pathian kutngei chu kan ni thei asin!



Synod Bookroom lekhhabu thar thenkhatte

1. **Solfa Zirna Bu:** Synod Inkhawmpui Vawi 85-na chuan 'Naupang Sunday School department hrang hranga solfa zirna tur syllabus leh text bu Synod-in siam rawh se' tiin a rel a. Chumi tihhlawhtlinna atan chuan Synod Music Committee chuan Solfa Zirna Bu tha tak mai a rawn peih fel ta. Kohhran leh Sunday School zirtirtute tan neih ngei chi a ni ang. A man Rs. 30 a ni.
2. **Ni tin Pathian aw hriat dan :** TV lama thusawi baka ziaka rawngbawltu lar Joyce Meyer thuziak, Zothanmawian Mizo jawnga a lehlin Joyce Meyer lekhhabu lehlin thar ber chu peih a ni leh ta! A lekhhabu hmasa ang bawka tha a ni e. A man Rs. 180.
3. **Setan never sleeps :** Pearl S. Buck ziah, R. Lalrawna lehlinah hian Communist ram, China-a Kristian Missionary-ten harsatna leh tihduhdahna an tawrh nasat thu tar lan a ni a. Chhel tak leh huaisen taka thlemna do thintute a hun taka Pathianin a tanpui thin dan tar lan a ni. A man Rs. 100.
4. **Mizo jawng Dictionary :** Jawng hi kan hnam chhinchhiaha a ni a, kan jawng ral ni chu kan hnam ral ni a ni dawn a ni. Jawng tihhmasawmna lam veitu Padma Shri Awardee meuh R.K. Lalhluna chuan Mizo Jawng Dictionary tha zet mai a rawn chhawpchuak ve leh ta. Aman Rs. 160.
5. **Doctor nuna thil makte:** Tunlai thalai zingah zu leh ruihhlo ngai, nun beidawng leh mipat hmeichhiat lama inhmaing tam tak an lo awm ta. Hetiang mite zinga rawngbawla a tak ngeia luhchihltuin a thil tawn a pholanna lekhhabu hi ruihhlo ngai leh thalai beidawng zinga rawngbawltute tan neih ngei chi a ni e. A man Rs. 80.
6. **William Carey:** Chul thei lo Missionary ropui, Protestant khawvela 'Missionary Pa' tih hlawh hial, kum 200 aia rei liam tawh hnu pawha Mission lam thlinna leh hmalakna kawnga thu la sawi ring thei ber William Carey-a chanchin, P.L. Lianzuala buatsaih. A man Rs. 100.

BO

— Lalmingsanga Vanchhawng, Chawngtlai Br.

Pathian biak leh Pathian chibai buk tih tawngkam hi Thuthlung Hluiah vawi 122 lai hman a ni. Thuthlung Tharah chuan Pathian biak sawi nan Grik tawng proskuneo tih hi an hmang lar ber a, a awmzia chu "roreltu emaw Pathian emaw hmaa kun" tihna a ni a, hmun 52 laiah an hmang bawk. Pathian biak tih chuan a huho a biak hi thlur bing deuh tum ila, tah chuan mahni a fianrial a biak leh huho lo pawh a biak theih a nihna kan sawi nep na a ni chuang lo tih lo hre hmasa ila.

Pathian chibai buk hi kan tih tur a ni: Miin Pathian ropuizia leh a nihna a hriat phawt chuan, amah chu chibai buku a ni lo thei lo a ni. Miin Pathian nihna a hriat a, thinslunga var pawhna leh amah zawmna a neih chuan a zawm Pathian hmaah a kun mai thin. Chutianga chibai bukna chuan nun pum a huap a, hmun ruat bik a biakna a kawbawk. Tin, Pathian ropuizia hriatna hian amah chu hlau leh thin, zah leh chawimawi a keng tel. Pathian biak chuan siamtu hmaa thilsiam, a kunna mai ni lovin

Roreltu Pathian hmaa mi sual a kunna a ni bawbawk. Kan Pathian hian chawimawi leh fak a phua, kan tan thil min tihsak tawh leh min tihsak mek leh kan hnena awm zel tiamtu a nihna te hre chiang a chumi avang chuan bia a fak leh chawimawit tur kan ni. Chutianga fakna chu Pathian hnathawh chhanletna a ni. Thinlung taka lawmna leh hlimna a kawbawk a, Pathianin a fapa kan tan a hlan a, a inpekna ropui em avangin kan fak a, kan biak hi kan tihmakmawh a ni. Pathianin kan tan enge a tih zel dawn tih lam thlir lova Pathian tan enge ka tih ve ang ti chung a biak hi Pathian chibai bukna dik a ni. Kan Pathian hian chawimawi a phua, amah ringtute tih ngei ngei tur a ni. Inthawina leh inhlanna a ni bawbawk a, sakhaw biakna tinah hian inthawina a awm a, Kristiante Pathian biakna, inthawina chu a danglam bik a. A khawngaihna chhan letna a ni a, sakhaw dangte anga tlawn lungawi tumna a kawbawk ve lo a ni.

Inkhawm hi a huhova Pathian chibai bukna a ni: Mi thin khat chu Biak Ina kan inkhawmin Pathian betute thlirtu ang chauhvin kan awm thin a, awm pawhawl tak a ni. Chibai buk tih chuan keimahniin kan pawlna a kawbawk. A hnena inpea, biaka, rilru pek aiin tan khawh

leh tlat siin kan awm fo thin. Kan chhandam nana thawktu hi pawhlah taka biak tur a ni lo va, amah kan pawlna a ni tih hriain thinlung leh tih tak zetin biak tur a ni. Inkhawm hi Pathian ruat a ni. A huhova inkhawm hi ringtu hmasate atanga tih thin a ni a, Pathian biak hona an lo nei tawh thin a (Deut 26:1-11). Thal hun, buhseng hunte tiin an lo hmang thin a ni. Thuthlung thar hun lamah pawh Temple leh Synagogue-ah pawh an inkhawm thin (Lk 4:16). Inkhawma Pathian biak ho hi ringtute awm dan tura ruat a ni a, Lal Isuan, "Ka hminga pahnih emaw pathum emaw an awm khawmna hmunah chuan ka tel zel ang" a ti a (Mat 18:20). Hei hi vawiin thleng hian a la dikin Pathian awmpuina kan chanzia a la lang a, Pathian awmpuina tel lo chuan Kohhran ho hi hei leh chen hi a kal dawn lo hrim hrim a ni. Tholeh Lalpa chu a miten an biak honaah a inlar thin a ni. Kohhran hi Pathian be ho tura ruat niin ringtu hmasate kha rilru hmun khat puin Biak Inah thahnemngai takin an awm thin (Tirh 2:42-47). Israelte pawh kha Pathianin a thlana, a hruaina chhan pawh kha awm hrang a, amah kha a huhoa pawl thin turin a ni a hruai ni (Num 11:4; Ex 19:24). An tawngtai pawhin hnam pum huapin an ti zel a ni. Inkhawm hi mi dangte

nena Krista hminga kan inpawlina a nih avangin kan tan a pawimawh a. Thlarauva Pathian pawlhovin taksa a kan bula awmte bakah hmun danga ringtu unau dangte nen thlarau hmun khatin kan awm hlawm a, rinnain Pathian pakhat hnuaiah kan kun ho va, fakna leh chawimawina kan hlan a ni.

Engtin nge Pathian chu kan biak

ang: Kan Kohhran Thurin 9-naah chuan, 'Ringtu zawng zawngte tih tur chu Kohhran inpawlhonaa tel te, amah be ho tura inkhawm te,' a ti a. Inkhawm hi kan mawhphurhna, kan tih ngei ngei tur a ni a, kan bat a ni. Hei hi mahni lam inhawng taka Pathian aw ngaihthlakna a ni a, hetiang ngaihtuahna hmang tur hian inkhawm hun chhung chu kan inthunun hram hram tur a ni. Nui vur vur chung chuan Pathian kan hnaih thei lo vang. Pathian biao Biak Ina kan kal hian a duh zawnga kan pawl theih nan sual puan hi a tul a ni. Tih tak zeta sual puan hian simna a thlen a, chutah chuan Pathian ngaihdamna kan chang nghal bawk. Jakoba khan bumtu nih a inhriatna, a inpuannaah ngei khan nihna thar a dawng (Gen 32:27-28). Tin, Pathian faka hla sak ho hian ringtute a tipumkhat a, in-unauna pawh a lantir a, thu

ngawta fiah lo kha a thluk a lo tel kha a lo fiah em em thin. Zaipawlin hla kan remte hian ngaithlatute nen rilru hmun khat puin thlarau hmun khat changin kan awm a. 'Haleluia! Amen!' kan ti thei thin a lo ni. Pathian biakna pawimawh tak pakhat chu thilpek hi a ni a. Pathian hnena thilpek hi tlawn lungawina ni lovin kan inzawmna thiltiha lantirna a ni a, min hmangaihna chhan letna a ni bawk. Rawngbawlna pawimawh tak a ni bawk. 1 Chro. 29:14-ah chuan Lal Davidan, 'Thil zawng zawng hi i hnen aṅga chhuak a ni a, i ta chu kan rawn pe leh mai che a ni si a,' a ti. Ringtuten kan tihmakmawh a ni. Mizoram kohhranhote thilpeka hma kan sawn mek lain thenkhat 'thawhlawm thawh a ṅul lo ve, mahni kan inpek chuan a tawk' ti tawkte pawh kan awm ve mek zel tho a, 'kan Pathian hi thilpek hmangin biak ka duh lo' an tihna a ni thei ang. Chu bakah, ṅawngṅai hi mi mal leh huhova biakna pawimawh tak a ni a, chumi a nih rualin awlsam dan deuh a awm a, chu chu soal laka inthiarfihlim a ni mai. Lam hi inkhawm chhunga kan tih hnem pawl tak a ni a. Amah nena kan inpawlna, chibai kan bukna, kan biakna pawimawh tak a ni.

Tlangkawmna leh thuhiril:

Kan inkhawm hi han ngaihtuah ila. Thuhiril hian inkhawm zawng zawng hun chanve a luah a ni. Thuhiril chu Pathianin mihringte hmanga a duh zawng a puanna a ni a, thuhiril hian – Chhandamna chang tura Krista hnena mite hruai, ringtute Krista anna kawnga hruai, ringtute tihnggeh, tihthlamuan te, Pathian pawltir tumte. Pathian ngaihsak tura mite buatsaih, mite hriatthiam tur zawnga Pathian thusawi, mi chi hrang hrangte hnena Lal Isua chanchin tar lan, bawhchhetu mihringte tana beiseina siam. Thuhiril hi kawng hnihin then thin a ni a, 'Hre lo te hirih hriatna leh ringtu hre tawhte chawmna' tiin an sawi thin. Pathian biaknaah hian Thuhiril hi mipuite leh Pathian inkara palai hnathawktu a nih avangin hmun pawimawh tak a chang a, hun hmang thinte pawh kan ṅan a, kan inbuatsaih that a ngai hle a ni. Thuhiriltu vangin tam tak chu kan inkhawmin kan inkhawm loh phah mai mai bawk si a. Mihring leh Pathian inkara palai kan nih avangin theih ang tawka kan inbuatsaih a ṅul a ni. Keini kan danglam a, kan Pathian hi danglam ve ngai lo a ni si a. Amah hnaih a, amah nena inzawmna nung nei reng turin KṪP member-te hian ṅan i la thar ang u♦

KA HRE CHIANG VE TA

— Imanuel Lalchansanga,
Suangpuilawn Br.

BSI Circle Meet-a zaia rawngbawla kan kal chu tisa leh thlarau lamah hlawkna tam tak ka chhar ve a, ka thalaipui tam takte tih tak zeta Pathian thu an buaipui ka hmuhte chuan ka ngaihtuahna an tithuiin min cho thar ve hle a ni. Heti khawp hian a ni maw ka thalaipuite hian Pathian thu an lo duh a, an lo tuiptui le tiin ka ngaihtuah zui neuh neuh va, chuti chung chuan inkhawmpui a tiak a, mahni khaw lamah kan haw ve leh ta mai a. Keima mi mal nun leh rawngbawl ka lo intih ve thinnate ka chhui kir a, thlarau lama hmasawn thar ve zel chu ka tih tur hmasa a ni tih chu ka hre mai a, tan lak thar ve deuh deuh duhna chu ka rilruah chuan a lian haw ve hle a ni.

He inkhawmpui zet hi chu ka hre ve reng tawh dawn a nih hi. Thlarau lama hlawkna thar tam tak ka dawn mai piah lamah tisa thil tak pawhin hlawk ka inti ru ve riau mai a. Chung zinga langsar ber pakhat leh he aricle ka ziah chhan ber chu hei hi a ni.

Tlangvala pompa, zawnglai ni ve ta fam chuan nula hmelhriat tharte pawh kan tawng ve a. Ka sakhmelin rualkhum mah suh se phu tawk erawh siamtun ka tan min ruatsak ve zel a ni chek ang chu, tawn thar di suihlung hnemtu dar khawpui lanu an sawi tha thuangpui ka tawng ve ta hlawl mai. Chutih mek lai chuan siamtun ka tana thlarau lam zirtirna thar leh kailawn rahka thara ka pen leh na tura a remruat a lo ni lek fang ang tih chu keia tan ngaihtuah phak rual a ni lo.

Chu ka chhas thar chuan ka lung hi a va'n dum zo hliah hliah em. A hmel, a pianzia leh pawn lam lam danah ringawt pawh sawiselna tur reng ka hmu lo. Chu achhapah, a rilru chhungril thatna, a anka nem diai mai leh Pathian a thinnate chuan a hmeltthatna chu a nemnghet zual sauh bawka. Hei hi em ni ang ka tana khuanu ruat chu. Kan inhre chiang telh telh a, ka insit tial tial mai a nih chu. Phu lo inti rilru tak chung chuan ka thinsung chhungril ber chuan ka tana Pathian ruat ni se a ti ru deuh tlat mai a, min thlahlel taka ka kianga a awm a, min ngaih ve thu a sawite hian ka tan khawvel hi a mawi zual a, he lei hrehawm pawh hi ka thlahlel ve tan ta riau mai le. A zun zam chuan hrualhrui angin min phuar ngheet ta hle mai a, khua hmuna leng kan nih loh avangin thlahlel hle thinn mah ila inthenna kawla

lo eng leh thin. A ngai a ka suihlunglen chuan kian ni reng a nei si lo, a ni telin a zual ta mai si a. Pathian aiin ka thinlung leh ngaihtuahna chu a luah tam ta zawk tlat mai le.

Eng emaw ti tak chuan ka nun pawh min kaihruai tha hle a, zan tin Bible chhiar turte kan intiam rual thin a, inṭawngṭaisak tawn nan Thawhtanni tlai dar 3:30 a nih tur thu te kan rawt dun zel a. Ni danga ka lo la tih ngai miah loh tam tak min tihpui ta zel mai a. Biak Ina ṭawngṭai tura ka kal pawh a tam ve ta telh telh a, chutianga ka thlarau nun kawng pawh min hruaitu pawimawh tak a nih avang chuan ka hmangaihni ka tana Pathian min ruatsak ngei a ni ang tiin ka pawm nghet ta hmiah mai a nih chu.

Amaherawhchu, Pathian remruat dan lo makzia leh mihringte hriat fiah ve phak rual a nih lohzia chu a lo lang ṭan dawn ta. Karah hmelma an hrang nge chu ka hmangaih em em chuan rilru dang a pu ta tlat mai le. Amah ngaia lungleng em ema ka awma, ka biak chak ngawih ngawih laite hian min be duh lo ta zeuh zeuh mai le. Chutianga hun khirh tak ka tawn chhoh tak avang chuan Pathian ka auh tam phah leh zual a. Amah ngaia ka lunglenna bang tur leh kan inkar buaina chin felpuitu atan Pathian ka auh pawh a tam telh telh a. A chang phei chuan ni khatah vawi thum vawi

li pawh tawk zo ka ti ta lo. Pathian ka au lawm lawm a; mahse, chhanna reng ka hmu si lo. Lungngaia beidawnga ka indawm kun tlawk tlawk lai chuan chhanna Chiang takin ka dawng ta. Pathianin chhas thar duhawm tak, a hmela, a pianzia, a nun leh engkim mai sawisel bova ka lo chhal min pek chu Pathian aiin ka lo dah lal ta zawk a. Ka thinlung ril ber ata Pathian dah chhuakin ka chhas chu ka thinlung ril ber chu ka luahtir a lo ni reng mai tih ka hmu chhuak ta a ni.

Siamtu remruat hi zawng keia hrilh fiah zawh rual a ni lo ve. Ka hmangaih ve em em chuan zamualpui liamin ṭang dang min belhsan mah se, kan kar thuhlaa Pathian ka auh chu a bang thei chuang lo va, ka thlarau mitmeng pawh a fiah ve hret hret zel a, Pathian chu tu thik rual lohva kan nuna dah pawimawh ber tur a nihzia ka hre Chiang ve ta a.

Aw le, duhlai, lêm ang derin zamual chu min liamsan mah la, nangmah vang hian Pathian ka auh tam phah a, ka thlarau nunah zirlai pawimawh tak min lo zirtir a lo nih hi. Ka haw reng reng lo che a, eng ang pawhin awm la, engtiang pawhin min ti la ka lungawi e. Lungawi zel ka ching ta si a. Nimahsela, thanganvau zaiva siar zawng leh chhawrthlapui a en chung chuan nang nghilh zai reng hi ban zai ka rel lawng e. ♦

NOXATILLA-ah Work Camp-in kan kal

– R.L. Nunpuia, Secretary
Bukpui Br.

Nikum 2012 kum bul khan Branch Commitee-ah Branch Project atan Synod Mission Board hnuaiha a remchang hmasa berah 'Work Camp' neih kan pass rup mai a.

Khawpui Branch-te leh Branch dangte angin hna tha tak leh chhenfakawm takin zuk thawk lo mah ila, Work Camp-a kan chhuak ve ringawt pawh hi keini Branch hmar khaw thim zangkhaw bungbut hnan hmuna awm tan chuan thil ropui tak a va ni tehlu em! Kan Branch kum 60 tling ve tep tawhin hetiang Branch upa ve tawh tak work camp-a kan wawi 1 chhuahna tur a nih avang pawh hian kan lawmna a nasa lehzual.

Pathian rinchhanin:

Hun leh ni leh thla a ral zel a, kum chanve a ni ta der. Sum leh pai tam tak ngai tur chi te a ni si a. Hnatlang tur anga chem leh chawfun nen, dal 2/3kg. vel nena chhuah ngawt chi lah ni si lo. Pathian rinchhan tak meuh meuhin ruahmanna kan siam a ni. Keini Branch angah chuan sum tam tham thawh chhuah harsatzia chu khawpui chung atanga ngaihtuah thiam phak

bak a ni ngei ang. Budget kan siam ve naa, kan sum neih lah chu eng ruai a la ni lo va, kan tih theih chhun chu Pathian hnena bang lova tawngtai a ni. Rev. Lalnuzira, Bialtu Pastor-in thahnem min ngaihpui hle mai a, a chungah pawh kan lawm hle a ni, ani hian Synod Mission Board lamte min lo dawrsak a, amaherawhchu, kan kal theihna tur awm tawk sum ngai tlem lah chu thawh zawh tawh leh thawh lai mek te alo ni zel si a. Sum leh pai sen tamna tur lam hi chu kan tinzawn phakah kan ngai si lo va.

Tlai ngai lo Pathian:

Hun a liam duak duak a, November thla chanve kan pel ta der mai. Kan kalna hmun tur lah kan la hre thei baw si lo, kan hruaitu thenkhat phei chuan kuminah kan kal thei lo vang an ti hman tawh a. Chutah le, tlai ngai lo Pathian a rawn che ta. Rev. Zairemkima h/o Pi Sangpuii (Sangpuii hi kan khaw mi a ni) Silchar Mizo bial vawngtu kan be pawp thei ta hlauh mai a. Ani hnen atang hian Noxatilla-ah Biak In platform chhun khah tur leh quarters' sak lai chhuat lei chhun khah tur a awm thu kan hre ta, kan va han lawm tak em.

Pathian rinchhanin :

Kan hnathawh tur lah chu lei laih tawrh, zawn leh tawrh, kan branch thawh thiam chi tak, kan mistiri-na lam tak a lo ni leh zel a...Pathian remruat a ni kan ti

lo thei lo. Tichuan, kan hruaituten a hun tur atan December 10-12, 2012 chu an rawn ruahman ta. Mumangah pawh kan la man ngai loh, hahipa kan lo sawi thin, work camp kal turin kan inpuahchah ta. Tichuan le, December ni 10 (Thawhtanni) khua a lo var chuan... kan kalna hmuna kan mamawh tur ang zawng zawng - dekchi, thleng, no, bawngtuthlawh, suahdur, leivung zawna tur buara chenin kan kalna tur 407 truck-ah chuan kan hlang ta. Kohhran bungruate Kohhran Committee-in min hawhtir avang pawhin kan lawm hle, chu mai bakah senso atan Rs. 2,000 min la pe leh zel a ni. Kan chhuah dawnin kan upa senior Upa P.C. Awklianang tanngtaiin min thlah a, dar 6:30 a.m.-ah mipa 19 leh hmeichhia 4 leh Kohhran aiawh Upa F. Sikulreman min ho thei a, anen hian mi 24 kan thawk chhuak a ni.

Tlai dar 4:00-ah kan work camp neihna hmun tur Noxatilla chu kan thleng ta a, Missionary Staff Nurse Muansangi quarters' (Muansangi hi kan khaw chhuak bawk a ni)-ah thawktute leh thalaiten min lo hmuak a, thingpuite kan in zawh hnuin kan riahna hmun turah kan insuan lut ta a ni.

Noxatilla khaw chanhin tlangpui:

Noxatilla hi Cachar District niin Cachar Tlangram huam

chhunga awm a ni a, Silchar Mizo Pastor Bial-a awm a ni. Kohhran puitling 7 leh Branch Church 1 a awm a. Kristianna hi kum 1961 daih tawh khan a lut a, kum 2000 bawr vel atang khan Mizoram Synod hnuaihan awm tan a, kum 2013 atang hian Synod-in Synod Mission Board hnuaihan School a hawng tan nghe nghe a ni.

Hnathawh dan tlangpui:

Kan thlen thlak zan hi thalai inkhawm zan a ni a, kan tlai deuh avangin zanriah ei lovin kan inkhawm a, kan inkhawmna hi kan thlenna hmun atang hian km 2 vel laia hla a ni a, a thui vang vang hle a ni. Kan inkhawm hi NI. Muansangi, missionary S/N Noxatilla-in min kaihuai a, Pu Remlalpuia, KTP Bukpui Br. Leader-in Pathian thu a sawi kan ngaithla a ni. Noxa KTP member inkhawm zat hi 10 an ni a, inkhawm zawng zawng hi kan branch atanga inkhawmte nen 30 kan ni.

Tichuan, a tuk zing dar 6:00 vel atangin Biak In platform hi kan chhung tan nghal a, an Biak In len zawng hi a dung ft. 40, a vang ft. 22 a ni a, platform san zawng hi ft. 1 vel a ni a, a platform len zawng hi ft. 8/22 a ni, Biak In sak lai thlanga mi lei kan lai kuar a, Biak In platform-ah kan chhung zel a, kan tanrual leh thawhrimna zarah tukthuan ei hun velah kan chhung zo va.

Tukthuan eikham veleh quarters' chhuat chhun tur lamah kan bung leh nghal a, hei pawh hi a bul lawkah tuihawk luan kawr tur lei kan lai khuar a, hemi vung hi quarters sak lai chhuatah kan chung zel a, Noxatilla Kohhranin lei vung chhun tur an lo lakkhawm te kan chung tel bawka, tichuan khawlum hnuaiyah hah taka kan thawh hnuin chawhnu dar 2:00 velah quarters' chhuat chhun rual pawh kan zo thei ta a, quarters' sak mek len zawng hi a dung ft. 30, a vang ft. 15-a zau niin hma lamah varanda ft. 16 bial a awm bawka. Kan chhuat chhun san zawng hi ft. 2 a sang a ni. Hei bakah hian Biak In kawngkharpuikhar hnih kan siam a, School kawngkharpuikhar khat kan siam bawka. Tichuan, Pathian venna leh tanpuina zarah kan hna ber chu thawh zawhin a awm ta a ni.

Hemi zan hian secondhand thawmhnaw kan ken chu sem turin kan feh chhuak a, khu laia hnathawka an chhawr Diswali hnam Hindu sakhaw betute hnenah kan sem hmasa a, an in hi hmun karkik tak tak, inhlak tak tak an nih avangin kea kal ngai veka ni nghe nghe a, heng lai vela chengte hi chungkaw khawsak harsa ve tak tak an ni hlawm a, thawmhnaw hak tur pawh nei mumal lo te an ni a, zarah thawmhnaw lum hak tur pawh nei lo te an ni nual a, kan thawmhnaw sem pawh an lo lawm thiam hle a ni. Hemi zana

kan sem bang hi khu lai Kohhran mi harsa zual te hnenah lo sem mai turin kan dah a, thawmhnaw kan sem zawh hian Noxatilla Kohhran Upa Rona leh NI. Muansangi, Staff Nurse hnenah kan Branch Leader Pu Remlalpuian Rs. 2,000 Branch hmingin a hlan bawka.

Tichuan, a tuk December 12, 2012 zingkarah a hma nia Biak In kawngkharpuikhan siamte kan vuah a, dar 9:30-ah tukthuan kan ei a, kan eikhamah Biak In sak mek kan hnathawhna hmunah kan tanngtai ho a; tichuan, zing dar 10:30-ah kan work camp-na hmun Noxatilla chu kan chhuahsan ta a. Tichuan, Bukpui chu zan dar 7:45-ah kan thleng a, kan Upate leh Kohhran mi eng emaw zatin thingpui tui tak nen min lo hmuak a, kan Kohhran Secretary Upa H. Lalvulmawia chu Pathian hruaina avanga lawm thu sawia a tanngtai hnuah kan haw darh ta a ni.

Lal Isuan, "I chakna leh theihna ni lovin, i rinna zawkin" a tih ang khan he work camp kal theia kan awm hi kan chakna leh theihna a ni lo va, Lal Isua rinna leh amaha kan inngah tlatna vang a ni. Tlai ngai lo Pathian a nihna hi hre reng ila, kan harsatnate, manganna te a hnenah thlen thin ila, Pathian hnathawh lan hma hauha beidawng mai lovin, amahah beiseina nung nei chungin nghak hram hram ila, tichuan, anin a hun takah min pui dawn tih chiang takin a hriat theih hle awm e. ♦

MEDIA HMANGA ṬHALAITE RAWNGBAWLNA

— Vanneihluanga

(April-a mi chhunzawmna...)

RAWNGBAWLNA

Tunlai hian Media hmanga sum tuakna leh Pathian rawngbawlna tih ri hi kan hre tam hle. A chang chuan, hei chauh hi rawngbawlna awm chhun emaw kan ti ta a ang viau. “Bial conductor ka nih chhungin Bial zaipawl cassette siam ve ngei ka tum tlat a ni!” tia Bial suma mi mal hmingchherna zawn vak mai te hi awl tak a ni. Rawngbawlna leh a rah lam aia rawngbawltu leh a hmanrua a lansarh zawk tawh chuan fel lo lian tak a awm tawh tihna a ni. Media hi hmanrua a ni. Hman tur a ni a, a sala tan tur a ni lo. Thlarau nun lama ṭhangharh si lova media chin chiaha kan harhvan viau chuan, TV-a kan programme an cover dawn chauha taima KṬP member langsar thiam leh zeife fe, rin tak tak tlak ni si lo kan hring

ṭeuh mai ang. Media chauh hi rawngbawlna hmanraw awmchhun a ni lo tih hriat thar pawh a hun. Media vang chauha KṬP-a inhmangte chuan, a buk ṭhelhin an ṭhelh tawh tihna a ni. Ṭhenkhat chuan zai leh rimawi hi kan ngaina a, lar leh lansarh kan duh bawk a. Hla lenglawng kan sak chuan ngaihnep hlawh kan hlau bawk si a. Remchangah Pathian fakna hla kan sa mai mai a ni. Hrawkbawk chung lamah Pathian kan au a, kan nunin Pathian a bihruksan si. Maicham serh thianghlim hmun ngei hi kan album thar tihlarna remchangah hman kan tum ngam tawh a ni. Hei hi zahthlak a ni satliah lo, a hlauhawm a ni. Pathian thil serh thianghlim hmanga mihring ham puar hi puarpawlung a ni satliah lo, thil serh tihbawrhanna hlauhawm leh tenawm tak a ni.

Tui ve lote:

Media rawngbawlna lama tui ve lo te leh he lam talent dawng ve lote hi Pathianin mi tamtak a siam ve tho tih hriat tur. Zai leh rimawia tui ve miah lo ṭhalaite tan kan fellowship te hi a ninawm viau lovang maw? He

mite hi an sual a ni lo, an tui lo a ni ve mai. Media hmanga kan rawngbawlna hian hetiang mite hi KTP huanga tel a inthlahruntir tawh a nih vaih chuan, insiam that ngai lian tak kan nei tawh tihna a ni ang. Mahni branch theuh i inenfiah ang u.

ZAITHIAMTE KHAWVEL

Rawngbawlna tha leh remchang a nih thu chu sawi ngai lovin kan hria. Zaithiamte rawngbawlna hi Biak In thleng phak lote hnena rawngbawlna tha tak a ni. Sermon thlen phak lohna zu zuar inah pawh Fakna hla satute music video an chhuah han hmuh changte hian thinlung a khawih a, a lawmawm dan hi a thuk takzet a ni. Mahse, kan music video an en avanga sual sima nun thar nei an pung em? Mizoram hian kan mamawh tawk aia tam zai thiam kan nei tawh a. Pathian fak hla sa zingah an tam zual. Chei mawi leh chawimawi sen an ni ta lo. Chuti chung pawha kan rawngbawl nain sawi a nei lo a nih chuan hengah hian kan inenfiah a ngai a ni.

1. **A hautak:**

Music video lo thlur bik ta ila. Tunah hian, Aizawlah Track music pakhat siam man

Rs. 600, zaithiam aw nena thun man darkar 1 ah Rs. 300 a ni. Tihsan tum mek a nih avangin he thuziak hi chhuah a nih meuh chuan, hla pakhat 'ri' ringawt siam man hi cheng sangkhat chuang a ni tawh ang. Chu hla pakhat Music Video siam man chu Rs. 3000 a ni leh a. Zaithiam incheina thawmhnaw leh hun senral nena chhut chuan Music video hla pakhat siam man belhkhawm hi cheng sangnga aiin a hniam thei lo. Chutiang music video thar, a thlawna chhuah tur chu Aizawla Cable TV-a Hmeh chhuah channel chhuahtute hian, tunlai hian kar tin 7 dawng ziah ang vel an ni. Chumi zinga tam zawk chu fakna hla a ni. Let leh awm miah lova zaithiamte chhungkaw sum luang ral zat belhkhawm chu thla tinin Rs. 1,50,000 vel a nih chu.

2. **Tangrual lo:**

Fuh tam tak kara fuh lo vek vek chu pawh tak a ni thei. Hla phuahtu hla thu ken (message) mil lo deuhin track music an han siam phawt a. Rimawi thawm chu serh thianghlim maicham bula tihrik awm ni lovin, huau huauna hmuna tihrik awm a ni fo. Zaithiamin hla phuahtu tum loh dan deuhin a han thlep

danglam zui a. Hla thuin eng nge sawi a tum tih ngaihtuah miah lovin, video thlalatuin, Pathian aia zaithiam lansarhtir tum ni awm takin thla a han laksak a, MTV hrin video editor-in leplêrh thei ang berin a lo 'tuihnih' leh a, hmeh chhuah channel-a thlangtuin ngaihmelh tum ranin a han thlang lehngal a. Thlarau thilpek hmanga rawngbawl-naah hian, thilpek Petu aia thilsiam mihring leh khawl a lansarh zawk vaih chuan, lak khawmpuitu ni lovin, tidarhtu kan ni ngei ang le.

3. Nunphung a tibuai:

Mi tu pawh, zaithiam anga chhinchhiah a nih tawh chuan, tlangvalin gas bur put a zak a, nului city bus-a chuan zak tawh lekin mi hriat a hlawh a, taxi khera chuan a mamawh tawh thin. Mipui hmaa a din apianga thawmhnaw ngai hak fo lah an ngam tawh si lo. Milar ni chung a cell phone neih loh chu a zak leh a... a music video a lar zawh poh leh a nunphung a buai ta mai a ni. Hlawk chu sawi loh, hautak deuhin rawng an bawl a, in chungah țangkaina an nei tlem a, hriat an hlawh avangin mi fak leh rel an hlawh tam a, ngaisangtu an tam chuan thlemna an tawh

tam a, an mi mal nun leh chhungkaw nun thlengin a buai a, dinhmun derthawng takah an indintir thei a ni.

Zaithiam an tam avangin kan indem ngawt thei lo. Kan ramah țhalaite inhmanna remchang a tlem a, an hriat chhun an ti a ni mai. Inkhap chi a ni lo va, tih dan dik kan inkawh hmuh a țul zawk niin a lang. Hengte hi i ngaihtuah hmasa ang u:

(1) Pathian rawn a ngai:

"In khuaah zai thiam in nei ve em?" tia miten min zawh changa "Nei e!" tih duh vena avang ringawtin Branch hruaitute hian "Kan khaw zaithiam" kan chher chawp palh thei. Mahni branch inkhawma solo thei nazawng hi ram pum huapa lartir tuma beih vak chi a ni lo. An mi mal nun, an zirna leh an chhungkua thlengin a buai phah thei. Rawngbawl tura Pathian kohna dawng chu dan rual a ni lo ang bawkin, kohna dawng lo nawr luih chu mualphona a ni thei.

(2) Thutakhmachhawna hun ta:

Thutak inhrilh duh si lova pawn lama mahni rilru ni miah lo sawia, "A țha khawp mai!" tih kan ching hi țhalai tam takin an mualpho phah a ni. Thiam si

lovin, thiam tak tak emaw an intih laklawh chuan, Pathian faka inngaiin, entute tan nuihza siam lek an ni palh thei. Thalaite mai ni lovin, 'fa lar neih châkna thlarau' hian nu leh pate thlengin min tuam mek a ni. Hetah hian fimkhur tlan a ngai ta hle mai.

(3) **I tih tur a ni em?**

I zai thiam tak tak mai thei. Mahse, i tui tak tak em? Lar ve laklawh siin, ning ru deuhin Pathian rawng i bawl palh thei a nia. Mipui hmaa a fala ding kher lovin, in veng zaipawla rinawm taka zai leh, lusunte hnem tura taima taka zai hi i rawngbawlina tura Pathian ruat a lo ni zawk mai thei a sin.

(4) **Milar chungchang:**

KṚP huang chhungah chuan, milar a awm tur a ni lo. Miin talent ropui lo dawng fal bik ta sela, khawvel chuan a dawngtu mihring chawpin a ngaisang mai thin. Kristiante chuan mihring hnena talent Petu zawk kha kan ngaisang a, talent dawngtu ni lovin a rawngbawlina kha kan dah chungnung zawk. Keini chuan Krista rilru kan pu tlat a, fakna hla satu zaithiam ropui ber leh

inkhawm dar vawtu hi kan en dan a inang reng tur a ni. Milar chhinchhiahna dawngtute pawhin hei hi theihngilh suh se. An talent leh an rawngbawlina avanga hriat leh duhsak an lo hlawh a nih pawhin, a Petu leh Malsawmtu a langsar zawk ngei ngei tur a ni. Kristian khawvelah chuan, ropuina hi mihring ta a ni lo, chatuanin A ta a ni.

(5) **Zai thiam tak tak:**

Kohna dawnga Pathian faka zai i duh tak tak chuan khawvel hian a dang zo chuang lo vang che. Ruah sur karah favah kengin buh seng turin mittui nen i feh chhuak ang a, chei mawina tlereuh leh chawimawina parthi tel miah lovin, daipawna ring lo mite zingah khur chungin i zai ang. Thisen chhuak khawpa an cheksawlh che a nih pawhin, lir a lo nghin a, mi tangte kawl bun a tlak hma chuan i zai zel ang. Chutiang mi ngei chu van khian zaithiam a tih ka ring. He ramin a mamawh aia tam zai thiam a hrinte zingah hian, chutiang khawpa zaithiam chu KṚP hian pakhat tal a hring dawn lo'm ni ?

Hruaitu CHANCHIN

Dr. Julie Remsangpuii

Nula ngo lampang, feet 5.2" -a sang, kg. 56 bûk, Dr. Julie Remsangpuii hi kum 1981, July ni 2 khan Presbyterian Hospital-ah a piang a. A pa chu Upa Lalsiama Fambawl a ni a, a nu chu Pi Vanlalhruaii a ni. Unau pathum, mipa pahnih leh hmeichhia pakhat a nei a; Julie-i hi a upa ber a ni.

A koh dan thuah harsatna a awm hran lo. A ðhenin 'Julie' an ti a, a ðhenin 'Sangpui' an ti a, 'SP' tia ko an awm bawk. Mize ðha leh ngaihawm tak nei a ni a. Naupan lai aþanga nu leh pa thu awih thei tak, nun ngil leh lehkha thiam thei a ni.

Kum 1985-a kum 4 a nihin Holy Cross School, Champhai-ah zirna a ðan a. Primary School chu a nu enkawl, Govt. Complex English Medium School-ah a kal a. Helen Lowry School aþangin Middle leh High School a zo a. Govt. Higher Secondary School-ah H.S.S.L.C. a kal leh a, Govt. Zirtiri Residential Science College aþanga B.Sc. (H.Sc.) a zir

zawh hnuah, MZU-ah MSW a zo leh a. Kum 2011-ah Ph.D. a hmu leh ta a ni. Zir hi nuam a tih zawng a ni a, thlan ko thlen hma chu chak zawng leh nuam tih zawng zir tur awm apiang zir zel theih hi a chak ber pakhat a ni.

Kum 2005 khan a ðhianten NGO an din a. He pawl Cod Nerc hi enkawlin, General Secretary leh Executive Director a ni a. Tluang takin hetah hian hna a la thawk ta reng a. Sumdawna lamah pawh hma lain Wisdom Traders-ah a neitu pakhat a ni bawk.

Rawngbawlna lamah chuan - KÏP Group leh Branch-ah mawhphurhna hrang hrang chelh tawhin, kum 2000 aþangin Branch Committee-ah lut ðanin Treasurer chanvo te a lo chelh tawh a. Luangmual Bial chhunga an awm laiin kum 2004 aþangin Bial Committee-ah awm ðanin, Zonum Bial indan hnuah Bial Committee member, Treasurer te niin, kumin hian Finance Secretary chanvo a chelh mek.

Kum 1999 aþangin Sunday School zirtirtuah awm ðanin, Department hrang hranga a awm hnuah kumin hian Senior Deptt. Leader a ni mek. Social Front Committee-ah chanvo pawimawhte lo chelh tawh bawk.

Khawtlang rawngbawlna lamah pawh... CYMA general conference-a hruaitu hlun chawimawina dawng thei khawpa inhmag a ni a. An veng Govt. Primary English Medium School Managing Board-ah O.B. dinhmun te lo chelh tawhin, MPF Local Forum-ah te pawh a khaipa dinhmun te a lo chelh ve tawh thin.

Film en leh lehkha chhiar te chu a hobby a ni a, Sports lam chu a khelha khelha aiin a en nuam ti zawk chi a ni ngei ang. Tennis leh Gymnastic lamah a tui zual.

Kum 2009 khan Mizoram NYK thalai aiawhin China ram (Beijing, Chengdu leh Guangzhou province) a han fang a, chu aia a ngaihhlut zawk chu a mi ngaihsan em em Mother Teresa thlan a tlawh thei kha a ni. Julie-i hian a thil tum harsa tak chung pawha a hlenchhuah theih chuan a thilim thin.

KHB No. 266 '**I lamah min hip rawh, aw ka Pathian' tih** te, KHB No. 502 '**Fak leh dil hun lawmawmah hian' tih** te, KHB

No. 513 '**Kan zin kawng khawhar takah hian'** tih hlate hi a duh em em a. Sam 37:5 '*I awm dan tûr chu LALPA chungah nght la; Amah chu ring la, aman a ti vek ang.*' tih leh Luka 4:18 '*Riangvaite hnenah Chanchin Tha hril tura mi ruat avangin Lalpa Thlarau chu ka chungah a awm; Ani chuan salte hnena chhuahna thu leh middelte hnena mitvar neih lehna thu sawi tur te, tihduhdah tuarte chhuahtirna tur te, Lalpa lungawi kum thu sawi tur tein mi tir a ni'* tih thute hi a duh hle.

Chapo hi atthlak a ti a, mi dik leh mi tlang (frank) te hi a lawm a; mi dang tanpui peihte hi a lawm zawng tak a ni baw. "Kan theih chin chinah mi dangte tana kawng hrang hranga malsawmna nih tum hi a KÏP a, kan damchhan pawh a ni e" tiin a sawi.

Chaw eia sawm duh tan, Chawmeh uih leh rim na chi a ngaina tehchiam lo a, maian bai erawh chu tui a ti viau. Biak duhna i neih chuan phone number 9436142235-ah biak theih a ni♦



■ *I dinhmun i thlak danglam thei lo a nih chuan i rilru put hmang kha thlak hlahh teh.*

— Amy Tan



HRINGLANG TLÁNG

Ka pa leh ka laizaw, Betsie-i nen Holland rama kan inah thlamuang taka kan chen ho laiin khawvel Indopui 2-na a lo chhuak ta a. German lalpa, Hitler-a chuan Europe khawmualpuia Juda-ho zawng zawng chu suat vek tumin a theih anga tam Juda-ho a man khawm a; innghaisakna hmun (concentration camp)-ah tawt em emin a khung khawm a. Chutiang chuan Juda mi tam tak chuan an nunna an chôn phah reng a. Kan chhungkua chuan Juda raltlan zinga tam tak kan lo hum bakah, ei leh in turte kan lo pek thin a; an tlan chhuah zel theih nan kan pui bawok thin a.

Indopui chuan zual lam a pan zel avangin Hitler-a sipai rawva tak takte chuan kan chhungkua pawh chu min man a, concentration camp-ah min khung ve ta a. Rei lo te hnuaah ka pa chuan min thihsan zui ta nghe nghe a. Ka laizaw, Betsie-i nen chuan Nazi-ho tihduhdah leh sawisak rapthlak tak takte chu kan tuar ve tan ta a ni. Vengtuho chuan an hmaah chuan saruakin min kal kualtîr vel thin a; pet, riltam leh sawisakna tinreng kan tuar takmeuh a ni.

Chutiang a nih avang chuan Betsie-i pawh chuan rei tuar lovin min thihsan ve leh ta a, ka khua a har thin em em a; mahse Isua Kristaah rinnah ka nghah tlat avang chauhvîn chutiang sawisak leh tihduhdahna rapthlak tak tak chu ka tuar chhuak thei a ni.

Indopui a tawp hnu chuan camp aţang min chhuah ve ta a. Camp aţanga ka chhuah hnu chuan Europe ram hrang hrangah Pathian thu hrilin ka kal kual thin a. Tum khat chu German ram khawpui, Munich-ah Pathian thu ka sawi a, mipui lah an lo pung khawm nasa. Chung mite hmaah chuan Krista ngaihdamna thu ropui tak ka sawi a. Pathianin a fapa, Isua Krista hmangin kan sualte a ngaihdam tak vek thu leh kan sualna zawng zawng chu Pathianin a hriat reng tawh loh thu ka sawi a; ka thusawi ngaithlatu mipuite chu nun hlimna leh zalenna a chan theih nan Thlarau Thianghlim hminga inngaidam tawon theuh turin ka ngen hlawm a. Mipuite chu Pathian hmangaihna leh a ngaihdamna thu chuan a khawih hle hlawm a; a then chu an inkuah vawng vawng a, a then phei chu an tap zawih zawih bawok a.

Vawi leh khatah ka hriat ðhan em em mipa pakhat, ka laizawñ Betsie-i pawh min hriat chhuahñrtu leh concentration camp-a kan unawwa zahthlak taka in lo awmtñr ðhintu hi mipui zingah chuan ka hmu ta thut mai a. Chu pa ngei chu ka laizawñ, Betsie-i thih chhan pawh a ni tih ka hria.

Chutianga hun kal tawh ka ngaihtuah lai mek chuan chu pa chuan min rawñ pan a, a ban a rawñ phar chhuak a, ka hnenah chuan, “Unaunu, ngaihdamna thu i sawi avang khan ka lawm em em a ni. Kei pawh hi concentration camp-ah khan tâng vengtu zinga pakhat ka ni ðhin a; mahse, tunah zawng i sawi ang khan kan sualte ngaidamtu, Isua Krista zuitu, Kristian ka lo ni ve ta asin. Pathianin ka sualte a ngaihdamna thu kha ka lo pawm ta a; chu bakah i ngaihdamna pawh ka la mamawh a ni,” a rawñ ti ta a.

Chu pa aw ka hriat chuan hlauvin ka khur a, ka hamhaih lutuk sawi tur hre lo chuan chu pa kut phar chhuah chu enin ka ding ngawi ta reng mai a. Chu pa hmel ka hmuh chuan concentration camp-a ka pa tuarna te, ka laizawñnu lungngaihna leh keima tuarna ngei bakah Juda-ten tihduhdahna an tuar zawng zawng chu ka mitthlaah Chiang em emin a rawñ lang thar leh uar uar a.

Hun rei lo te kal ta khan uar takin Pathian ngaihdamna thu sawi mah ila chu pa chu ka ngaidam thei ta tlat lo mai a. Pathianin a hmelmate min ngaidam angin bawkin chu pa chu ngaidam ve tur ka nih ka hria. Tichuan chu pa ka ngaihdam tura chakna ka neih theih nan Pathian hnenah ka ðawngñtai ta a. Pathian chuan min rawñ tichak a, ka ðawngñtai zawh chuan ka pa leh ka laizawñ chungka kawng tinrenga nunrawñ chhuahtu pa ngaidam tur chuan chakna ka nei thei ta a.

Nazi sipai hlui kut chu ka lo vuan a, hlim em emin, “Unaupa, ka thihlung zawng zawngin ka ngaidam a che,” ka lo ti ta a; tichuan inhmelmak ðhinte kha Pathian ngaihdamna avangin unau kan lo ni ta a ni.

— Corrie Ten Boom (Source : Alabasta 2)



Hengte hi ka zir chhuak a..

Min dawrtu mihring reng reng hi ðawngkam ðhaa thlah zel tur an lo ni. Kan hmuh hnuhnun ber ðum an ni thei si a tih hi.

Mi huaisen ber ber chu a sawh let tur ngaihtuah chang lova a hun lai taka tih tur dik tak tite hi an ni tih hi.

Kan ðhian ðha ber ber pawhin eng tikah emaw chuan kan rilru hliamin, chumi avanga kan ngaihdam a mamawh hun a awm ang tih hi.

— Benn Chapman

www.mizoramynod.org

■ ■ ■ RIMAWI

ZAIPAWL ȚHA

— Upa C. Chalzika,
Leithum

Chanchin Țha Luka 2:13
thuah hian Vana miho
mipui an lo awm ta chiam a,
Pathian an fak a: *Lei chung a
lawm em em mihringte hnenah
rem thu leng rawh se, tiin.* Hei hi
anrawn sawi rual nge an sa.
'An fak a,' tih hian 'an sa' zai a
kâwk zâwk em tih min
ngaihtuahir a. Vana miho
mipui lo awm Țeuh mai hi
thawk leh khata lo awmho
thut an nih hmel a, an zai ho a
nih chuan he hla hi hla tawi
pawl tak a ni nge ang.

Pathian an fak a, an
chawimawi a ni. He fakna hla
ril tak hi a thuk khawp mai.
Conductor an neih awm hriat
a ni lo va, Berampute pawh
khan Pathian fak chung zelin
nausen Isua chu an Ținsan a,
eng hla nge an sak hriat a ni lo
tlat. Vana mipui lo awm ta
chiam hian tam tak an nih min
ngaihtuahir a, a zat lamah
buai lo ila.

Kan Kohhran (Presbyte-
rian) dinna tawh phawtah
chuan Kohhranin Zaipawl kan
nei tlangpui a, Kohhran
dangte pawhin zaipawl an nei

hlawm a. Zai lama hma kan
sawn nasatzia hi a ropui
khawp mai.

Zaipawl Țha nei turin
engte nge pawimawh hmasa
ang le?

1. ȚawngȚai tam
2. Displine
3. Thu âwih

Pathian fakna hla nung
taka sa turin inpekna thuk leh
sang tak neih a ngai a, heng ka
tar lan loh pawh hi pawimawh
ala awm nual anga, hei chauh
hi a pawimawh tihna a ni lo.
An pathum hian, Pa leh Fapa
leh Thlarau Thianghlim zat an
ni a, an pawimawh Țeuh
avangin lakhran theih an ni lo.
Pathian fakna hla chu zah tak
leh urhsun taka sak tur a ni. In
show mai mai na chi a ni lo.
miin a fak, Pathian a hriat chian
chuan thinlung takin a fak lo
thei lova, a fak ning ngai lo
bawk.

Zaipawl conductor chuan
Leadership a neih Țhat hle a Țul
a. Member-te leta a ȚawngȚai a
ngai Țhin. ȚawngȚai peih lote,
thununna pawisa lo leh thu
awihna tlachham mi chu solfa
thiam mah se member-ah leh
hruaituah dah loh ngam a Țha.

Tunlaini Zaipawl lamah
kan inel ta em aw tih turin
zaipawl an langsar ta a. DDK
leh Cable TV enin zaipawl
ropui tak tak, Pathian
chawimawitu hmuh nuam tak

tak kan nei nual a. Mahse, zaipawl nung leh nung lo chu an awm ngei mai.

Synod-in Zaipawl intihsiaak ropui a buatsaih kha a tihzia khawp mai. Inkhawmpui chi hrang hrang kan neihah hian Kohhran Zaipawl, Bial Zaipawl kan nei hlawm a, rimawi dang nen changtlung takin an zai ta a, a ropui tak zet a ni. Research beitung sawi dan chuan khawvelah hian sermon aṅanga piangthar ai chuan hla aṅanga piangthar an tam zawk niin an sawi a. Eng pawh ni se, thuhrituin urhsun taka a inbuatsaih chuan a sermon a nungin mi nunah thu a sawi ṅhin tih a ni a, chutiang baw k a inbuatsaih urhsun zaipawl zai pawh hi a nung hle ṅhin.

Zaipawl ṅha kan tihthe hi an ṅhat chhan chu Pathian nung fak tura thinlung leh tih

takzeta an inpek vang a ni, chu chu Pathianin mal a sawm a, zaipawl ṅha leh nung an lo ni ṅhin.

T.V. a zai dawn vang ngawta inbuatsaih a zai hi chu a nung chiah lo a ni. ṅhenkhat an lu a buk em em a, ṅhenkhatin an mit an hnawh dur hum mai a, hmuh a nuam lo deuh. Pathian faktute hian kan inchei danah te, kan taksa thlengin Pathian kan fak a ni tih hriat theiha kan nun a hun hle.

Kan chetzia leh kan hla sak a inpersan tur a ni lo. Zaipawl member ṅha, zaina hmuna ṅha hle si kan awm lohna tura kan awm miin an hmuhin a tui loh phah thei. Mi pakhat zaithiam tak chu a chetzia a fimkhur loh vangin tu man an ngaina thei tlat lo zu nia. Hetiang baw k hi kan ni thei a ni tih hre thar i la a va tihzia dawn em ♦



*I nu leh pate tibeidawng suh,
An enkawl seilian che a nia aw.
An thu awih turin inngaitlawm reng ang che,
Thu petuah i ṅang palh hlah ang e aw;
An phak tawka an enkawl seilen i ni e.
ṅhian thlanah fimkhur la,
Kawppui ṅha tak thlang turin fimkhur la;
I thil chin ṅhante thununtu ni ang che.
Lirthei i khalh hunah mi hmuha intihtheih aiin
Him taka khalha kalna hmun tur thlen a ṅha zawk tih hre reng la.
Thil dik leh pawimawh avanga i din tlat ngam loh chuan,
Eng emaw vangin i tlu tho tho vang.*

HRISELNA ■■■

ZU IN MITE TAN

– C. Lalthanchunga,
Dte. of Health Services

Zu khapna dan siam hmasak ber hriat theih chu kum B.C. 1100-a East China-in a hman kha a ni awm a. Zu hi khawvel sawrkar hrang hrante pawhin an lo khap fo tawh thin a; mahse, zu in leh zuarte chuan an sim phah lem hlei lo va.

Zu in miin a sim theihna dan ber chu zu hi drugs chi khat hlauhawm tak a nihzia leh mahni tumna aṅanga sim theih a nihzia an hriat chianna aṅangin a ni. Hetianga mipui zirtir tur hian sawrkar, kohhhran leh tlawmngai pawl hrang hrangte an pawimawh em em a ni.

Zu hian mihring taksaah engtin nge hna a thawh?

A hmasa berah chuan kan thluaka in tereuhte te cell an tih tluklehdingawn eng emaw zat te hi a tichhia a. Hetianga tam an awm avang hian nuai tlem azawng chu lo chhe mah se, a pawl tehchiam lo va.

Mahse, kan tin te, kan vun te a thara an rawn awm leh ang hian thluaka cell te hi an insiam thar ve thei tlat lo mai a ni. A thi tawh chu a thi tawh a ni mai.

Zu ni 2/1, kum khat chhunga vawi 2/1 in hian thluak a tikhawlo pha lem lo va. Amaherawhchu, regular taka in chuan nasa takin thluak a khawih khawlo thung a ni. Thutlukna siam te a tibuaiin hriat rengna te a tichhia a, chu bakah, zirna lamah te mi a tiṅhuanawp thei a ni.

A pahnihaah chuan lung (heart) a khawih danglamin, lunga tihrawl (muscle) chakna te a tichhia a, hei bakah hian B.P. sang a siam duhin strock a kai chhuak thei bawk a ni.

A pathumnaah chuan kan taksa chhunga thil pawimawh berte zinga pakhat thin (liver) hi nasa takin a khawih pawl bawk a ni. Zu in lo aiin zu in miah thin ro natna (cirrhosis) hi a let riatin a awm duh.

A palinaah chuan kan taksa mamawh rilfang (small intestine)-in a hip luh thin vitamin B-12, amino acid, folic acid leh thiamine te hi kan taksa zu a awm chuan a hip lut thei ta lo thin a ni.

A tawp berah chuan kan mipat/hmeichhiatna te pawh a khawih khawlo thei bawka ni. A bikin mipaah chuan zu hian chakna (sexual urge) a siam chhuak thin naa, an mipa hlei thei lo thung a ni.

Engtin nge zu in mi chuan zu chu a nghei tak ang?

Zu in mite hian ankhum leh hauh hi a sawt lo tih hre hmasa phawt ila. Tin, an zu in tur paihsak emaw, thuhruksak emaw pawh a sawt chuang lo. Zu in sim tur chuan amahah bawka a innghat a ni. Zu nghei a duh tak takin a rilru chu zu nghei turin a sawh nghet tur a ni.

Hetianga zu nghei duhna thinlung pu tur chuan zu in mi chuan zu hi a hmelma a ni tih a hriat chian phawt a ngai a. Hemi hre Chiang tur chuan a hma a kan sawi tak, kan taksa a khawih khawlohna zawng zawngte chu a hriat chian a, in chhungkhura zu in hlimna a thlen lohza te a hmuh chhuah phawt a ngai a ni.


Hetah hian chhungkhat laina leh thenrual thate kan pawimawh ta a ni. Inhauha intihtauh khum aiin hmangaihna leh dawhtheihna a pawimawhin tawngtai- na nena tan lak a tul a ni. Zu

in mi tam zawka hi chuan an zu in avangin harsatna an neiin an tawka thin tih hi an hre lo va, a hriate pawhin an haider lui tlat a. An zu in avangin harsatna leh buaina a awm a ni tih anmahniah an inhrechhuak phawt tur a ni. Hetianga an inhriatchhuah a zu ngheina duhna tak tak an put tawh chuan zu nghei chu thil harsa lutuk a ni tawh lo.

Zu in luat avanga chaw thlah chingte tan erawh chuan harsatna ni 2 ni 3 vel chu an tawka ang a. Thlanin a bualin mutmu te an tuah thei lo ang a. Zu chakna khan a tur ut utin an pumpuiin chaw a hnar ang a. Chau em em e ti lo chuan, thil an ei thei lovin an muhil hlei thei lo bawka ang. Hetianga sawmte hi chu an taksa zu la chambangte kha thuah chhuah vek a tul avangin tui tam tawka intir a dextrose 5% inzawm zatin bur thum emaw khaisak a tha ber.

Amaherawhchu, zu lo in thang lutuk leh zu in a chiah hneh tak tak hoah hian 'Chiri' kan tih mai hi nei chi an awm a. Chuvang chuan, zu in miin zu nghei a duh tak tak a, nghei a tum chuan doctor rawn hmasak ngei ni se duhthusam a ni.

(Source : Hriselna)



KANTU

Hospital Veng Br. &
Falkland Br.

HOSPITAL VENG BRANCH

Hospital Veng Branch hi Ni 26, April, 2000 a din a ni a, Thingsulthliah Bial chhunga Branch naupang ber a ni. Kumin hian member 213 an awm a, Group hnihah an inthen a, Sub - Committee paruk - Programme, Evangelism, Decoration, Music, Property & Drama Sub - Committee te an din a.

Kum 2010 atang khan Kohhran chanchinbu 'Kohhran Aw' chu KTP enkawlin chhuah a ni. Kristian Thalai chanchinbu hi copy 58 an la a, copy 1 hi member 3.67-in inchhiar tawm ang an ni. Missionary pakhat an chawm mek a, Pathianni tlai Fellowship-ah Tirhkoh chawmna pual thilpek lakkhawm thin a ni a, an member-te atangin missionary-a chhuak pali leh Pro.Pastor pakhat an awm tawh bakok.

Faith promise, Group budget, inkhawm thawhlawm, KTP in luah man te bakah slab chhun te, rawra chhut te, chhangban zawrh te, book binding te leh a remchang ang ang sum tuak nan an hmang thin a, Group budget hi thlatin intuk thar thin niin Group pakhat atan Rs.3000 te intuk thin a ni a. Tin, thlatin thawhtan zan hmasaber inkhawm thawhlawm hi Group puala dah thin a ni. Kuminah hian Branch Project - Work Camp leh Sound tihchangtlun te neih a ni.

Thawhtan zan Inkhawmah member inkhawm zat bakah hengah te hian inchhiarna neih thin a ni - Group member, Group OB, Bible leh hlabu

keng, leh Branch Committee member-te. Hengte hi Group inel nana hman thin a ni a, kum tawpah lawmman siam thin a ni.

Biak In hawnga innei an tam theih nan theihtawp an chhuah a, an Kohhran Biak In hawnga nupui pasal nei an awm chuan Kohhran zaipawl an zai ngei ngei thin a, lawmpuina pek bakah KTP sound a thlawnin hmanthir thin an ni bakok.

An din tirh atangin Pathianni zan inkhawm bana tawngtaina neih leh an Kohhran chhungkua a mitthi an awmin mitthi chhungte a chawlnhi wawi hnihnaa inkhawmpui thin chu an la kalpui thei zel a ni.

Evangelism sub committee bultumin Branch Committee leh Evangelism sub committee tena member tlawhchhuah te, chaw nghei tawngtai te neih thin a ni a, Beihruul-KTP Fehchhuah programme an hlawkpui hle. Tin, Evangelism sub committee hmalaknain thla khat chhunga Bible chhiar tur siamin a chhiar chhuakte hnenah Branch-in lawmman a pe thin a. Central KTP atanga barozui tur hrang hrangte an ngai pawimawhin an tihlawhtling thei zel a. Kum puan zir leh thuziak zir te, sawi honate neini an hlawkpui thei hle.

An Branch tlawhtu an awm ve fo thin a, tlawhtu an awm thin chu lawmawm an ti thin hle, hetiang Joint Fellowship neih hi hlawkthlak an tiin anmahni pawh Branch dang tlawhin an fehchhuak ve thin ♦

FALKLAND BRANCH

Kristian Thalai Pawl, Falkland Branch hi April 8, 2001 khan Falkland Kohhran a indan rualin din ve nghal a ni a. Kohhran a indan tirh hian 'Zemabatok West P.S' tih hmimg puttir niin, kum 2002 Aizawol Hmar Presbytery Inkhawmpuiah khan Falkland Presbyterian Kohhran tia thlak dil niin SĒC-ah kal tlangtir a ni.

Falkland Branch hi kum 2005 hma lam zawng kha chuan Zemabatok Bialah a awm thin a. Kum 2005 Synod Inkhawmpui, Chanmari Kohhran Biak In-a neih chuan Thuampui Bial hawn a remti a. Tichuan, kum 2006 atangin Thuampui Bialah a awm ve ta a ni. Tunah hian member 205, mipa 123 leh hmeichhia 82 an awm mek.

Group pahni, ISAIA Group leh MIKA Group-ah inthenin, Group hi Branch tichaktu leh khai dingtu pawimawh tak a ni a. Group member inkhawm tam lamah te, hnatlang thawk chhuak tam lamah te inelna neih thin a ni. Sub committee pali - Evangelical Cell, Programme, Light & Sound leh Reception & Ushering sub committee neiin Kum 2003 atangin kar tin chhuak Branch chanchinbu 'KTP KILAWN' chhuah tan a ni a. Kristian Thalai chanchinbu hi copy 60 an la mek batok.

Kum 2012 chhung khan Rs. 1,28,841 an thawk chhuaka, Rs. 21,300 Kohhranah chhun luh a ni. Sum hmuhna tlangpui - Faith Promise leh Thawhlawm ip, Thawhtan zan inkhawm thawhlawm, Committee thawhlawm, Group budget, blanket suk, balu thiar/unload, rawra chhut leh lehkhachhe kharolte hmangin sum an tuak thin a ni.

Thla tin Ningani zan hnuhnung ber dawottuah Branch Committee neih thin a ni a, kum 2012 khan Thawhtan zan inkhawm hi 22.2% niin, Sermon, Group Nite leh Central KTP Kum puan Thupui zir ho nan hunte hman

thin a ni a, Member inkhawm kim zan leh Faith Promise Nite-te siamin hun hman ani thin batok. Central leh Bial KTP atanga tih tur awmte an ti-hlawhtling thei zel batok. Pathianni Sunday School inkhawm banah tawngtai inkhawm neih thin a ni a, sharing, games, leh thupui thlan bikte hmanga hun hman thin a ni. Evangelical Cell sub committee kaihhrainain Thawhtan zan inkhawm ban apiangin member-te tan tawngtaina hun hman thin a ni a, Zirtawp zan apiangin member-te inah inkhawmna hun hman thin niin, short sermon leh sharing-te neiin member-ten hlawkthlak an ti hle.

Kohhran kaltlangin missionary pakhat an chawm ve mek a, Branch member pahni missionary awmin Kohhran Upa pakhat an awm tawh batok. Member boral an awmin an boral ni atanga Pathianni vawi hnihmaah ralna hun hman thin a ni a. Ralna thilpek atan 'Thuthlung Thar leh Sam' leh Rs. 500 man hu thilpek hlan thin a ni. Tin, Kohhran member (KTP member ni lo) boral an awmin ralna atan 'Thuthlung Thar leh Sam' pek thin a ni batok. KTP member Biak In hawng ngeia nupui/pasal nei an awmin 'Holy Bible' leh citation maawi tak hlan thin a ni a, Kohhran zaipawl an zai thin batok.

Kohhran zaipawl tha tak neiin kar tin Ningani zan hi hla zirna hun nghet atan an hmang a. Hunpui pawimawh leh Kohhran Committee-in a beiseinaah zaipawl rawngbatolna tha tak an nei thin. Member intihtlangnel tawon nan leh inpawhna tha zawk a awm theih nan variety programme, zo zan, thin zan, leh KTP Sports-te neiin hun an hmang thin a. Tun kum tirah khan sound system tha tak Rs. 2,50,000 man leiin kohhran kutke leh kohhran tichaktu nih ngei tumin thahnemngai takin an thawk thin a ni ♦

Keimahni



■ January 19 -20, 2013 khan Serchhip Kawnpui Br. KṚP Golden Jubilee hmanpuiin Pu Vanlalhruaia, Committee member/Choir Director leh Tv. R. Lalruatkima, Committee member te an kal a. January 19 (Inrinni) zan inkhawmah Pu Vanlalhruaian thuchah a sawi a, January 20 (Pathianni) zan Fellowship-ah Tv. R. Lalruatkiman thuchah tawii a sawi bawk.

Golden Jubilee hmanpui hian Synod Choir pawh kalin, tum 4 dinah hla 9 an rem a; Dr. Zothansanga, Nl. Lalrinfeli, Nl. Nancy Zothanmawii leh Nl. Vanlalpari te an solo bawk a. Pathianni zan inkhawm banah Bethel Kohhran Zaipawh hla zirpuiin Synod Choir member 5 an kal bawk a ni.

■ March 20, 2013 (Nilaini)-a Central KṚP Committee thurel hrang hrang zingah KṚP General Conference 2014/Diamond Jubilee lawmna Thupui atan "THO LA, ENG RAWH" (Isaia 60:1) thlan a ni a, Conference Hla Bu buatsaihtu tur sub-committee din nghal a ni bawk.

Tin, I Love Taiwan 2013 (Youth Exchange Programme) leh Presbyterian Youth Fellowship (PYF) Biennial Conference 2013-a palai intirh dan turte rel a ni a, Presbyterian Church in Taiwan Thalaite (PCT Youth) leh KṚP te hian kum tinin Thalai intlawhtawwna programme an buatsaih thin a, kuminah hian I Love Taiwan Mission Camp chu June 26 aṅanga July 23, 2013 chhunga buatsaih tur a ni a, Mizoram aṅangin mi 5 vel intirh theih beisei a ni.

PYF Conference, kum khat dana neih thin chu April 26-28, 2013 chhungin Fiangpui Presbyterian Church-ah Kristian Vanglai Pol (Biateram Synod)-in an thleng dawn a, hruiatu thlan thar kum a nih avangin KṚP aṅangin mi 2 nominate tura hriattir kan nih angin Tv. R. Lalruatkima leh Tv. R. Lalramnghaka (CKṚP committee member)-te ruat an ni.

Central KṚP Committee meeting hian KṚP Rorel Inkhawm (2013) thurelte bawhzuiin hma lo la tur sub committee 3 a din a, chungte chu – Counselling training buatsaih dan tur lo duangtu sub committee, Kohhran Thurin Inzirtirna buatsaih dan tur lo duangtu sub committee leh KṚP Kum Puan (2014 -15) "I Pathian tawh turin inpeih rawh" tih chungchanga hma lo latu tur sub committee te an ni.

KṚP Inhruaina Dan leh KṚP Handbook enthat ni se, tiin rel a ni bawk a. Inhruaina Dan enṅhat chungchang bik hi Synod Executive Committee (SEC)-ah dilna thlen phawt tur a ni ang. Central KṚP Committee meeting-ah hian thurel tur chhawp chhuah an rel zawh hman loh avangin March 21 tlai dar 4:00 aṅangin rel chhunzawm leh a ni a ni.

■ March 15-17, 2013 chung khan Cachar Tlangram Presbytery KṚP Meet Zait-ah neih a ni a, he hun hmanpui hian Rev. Lalrinmawia, Leader leh Tv. R. Lalramnghaka, Committee member-te an kal a, Soloist Nl. Baby Malsawmtluangi, Dawrpui Vengthar-in a ṭawiatom. March 17 (Pathianni) chawhma, chawhnu leh zan inkhawmah Meet Speaker Rev. Lalrinmawian "Rawngbatol tura chhandam" tih thupui a sawi a, Pathianni zan Fellowship-ah Tv. R. Lalramnghakan thuchah tawi a sawi a, Nl. Baby Malsawmtluangi chu Inrinni zan aṭangin inkhawm apiangah a zai a, Fellowship-ah ṭum 2 a zai bawk. Cachar Presbytery-ah hian Pastor Bial 4 a awm a, Meet-ah hian palai (mikhual) 220 zet an kal a ni.

■ March 22-24, 2013 khan TUIVAI PRESBYTERY KṚP MEET Vawu 3-na Suangpuilawon Kohhrana neih hmanpuiin Upa Zothangzuala Chhangte, Treasurer leh Dr. H. Lalthanzara, Comt. member te chu an kal a. "I Pathian tawok turin inpeih rawh" tih thupui chu Pu Zotea'n ṭum hnih leh Pu Zara'n ṭum khat a sawi a. Meet hmangtu KṚP member te Phullen bial leh Phuaibuang bial aṭangin riaklut mi 400 vel awmin thlengtu Suangpuilawon bial member-te nen an zavaiin member 600 dawmin he meet hi hlawhtling leh hlim takin an hmangtu a ni. Hruaitu kalte hi zaithiam Tv. Zosangzuala Chhangte chuan ṭawiatomin inkhawm vawu 4-ah nung takin Pathian fakna hla a sa bawk.

■ March 22-24, 2013 chung vek khan Dampa Presbytery KṚP Meet vawu 2-na chu W. Phaileng Bethlehem Kohhrana thuang taka neih a ni. Dampa Presbytery-ah hian bial 3 – W. Phaileng, Damparengpui leh Tuipuibari bialte an awm a, meet thupui atan "Thil ṭha ti atana siam ṭhalaite" tih an hmangtu a, Inrinni chawhnu variety programme-ah Mizo hnam lam : Cheraw, Khual lam, leh Pipu zai te, Bru hnam lam leh Chakma hnam lam te entir a ni bawk a ni.

■ March 22-23, 2013 khan Hortoki Bialah KṚP Leadership training neih a ni a, CKṚP hruaitu Pu Lalnghinglova Hauzel leh Pu Lalmuanpuia Hrahsel ten an hmanpui. Rawngbatolna kawnga intihchak tawonna thupui hmangtu Zirtawp zanah Bial chung Branch hruaitute nen hun hmangtu a tuk (Inrinni)-ah training neih a ni, mi 43 training-ah hian an tel a ni.

■ March 28, 2013 (Ningani) khan KṚP, Tuirial Branch chuan an kum 25 tlin (Silver Jubilee) an lawm a, CKṚP Committee aiawhin Pu Lalmuanpuia Hrahsel leh Tv. R. Lalruatkima (Committee Member)-ten an hmanpui. Jubilee lawmna pual hian dar 11:00 a.m.-ah inkhawmin Pu Muanan thuchah a sawi a, Tv. Ruatkiman Souvenir a tlangzarh a ni. Tlaijah Jubilee lawmna ruai ṭheh a ni bawk.

■ April 2-3, 2013 khan "Two Day Regional Workshop on Disaster Management" Presbyterian Church of India (PCI) bultumin Synod Conference Centre, Mission Vengah neih a ni a, Workshop-ah hian mi thiamte buatsaih thupui hrang hrang zir ho a ni a, PCI hmun hrang hrang aṭanga kalkhawmin mi thiamte thuziak zir ho a ni. Hetah hian Upa Zonunmawia, General Secretary pawh a tel a ni.

■ April 5-6, 2013 hian Saikawrdai-ah Bial huap Leadership training neihpui turin CKṚP committee member Tual Upa Lalramdina Ralte leh Dr. Julie Remsangpui te an kal a, training-ah hian mi 50 an tel a ni.

Postal Regn. no. MZR/81/2012-2014
RNI No. MIZMIZ/2009/29074



March 15-17, 2013 khan Cachar Tiangram-Presbytery KTP Meet, Zaita a neih hmanpuin Rev. Lalrimawia, Tv. Ramnghaka leh zathiam Baby-I te an kal.



March 22-24, 2013 chung khan Tuivai Presbytery KTP Meet, Suangpullawn Kohhran a neih hmanpuin Pu Zotea, Dr. Zara leh zathiam Tv. Zosangzuala te an kal.



March 22-23, 2013 khan Hortoki Bial Leadership training hmanpuin Pu Nghinglova leh Pu Muana te an kal.



April 5-6, 2013 khan Sakawrdai Bial Leadership training hmanpuin Pu Ramdina leh Ni. Julie te an kal.



April 6, 2013 khan Kanhmun Bial Leadership training hmanpuin Pu Zotea leh Dr. Zara te an kal.



March ni 11, 2013 khan Sairang Bial KTP Leadership Training hmanpuin Pu Saitea leh Pu Dingtea te an kal.



CKTP Hruaitu
Dr. Julie Remsangpuii
CHANCHIN

Phêk 21-na



March 8-10, 2013 khan Chiahpui Branch Golden Jubilee Pu Remsiamia leh Tv. Ruatkima ten an hmanpuin.